

Seremaea

Iahova vise Seremaea mai vi provet onen
Seremaea 1:1-10,17-19; 17:5-10; 20:5

1 ¹Selusien keil koa mul en tus koanek, inau, provet Seremaea, namutisi. Navi natin Hilkia koa vi pris tai koa mul en taon ten out Anatot koa mul en atan onen koakeil akistal en mari vatiamal onen **Bensamin.** ²Navong asuv houlu Sosaea,^a natin Amon, losil kat meatin keil ten out Sudah sua teindan etel (13), Iahova selus rohtoh minau. ³Ka Ahi selus minau en sua vasi keil koa Sehoiakim, natin Sosaea, vi asuv houlu ka losil kat me-Sudah keil. Anatin, Iahova mul selus minau rokol avong koa asuv houlu Sedekaea, natin Sosaea losil kat me-Sudah keil sua teindan tai (11). En avati koa vi elim en sua koanek, me-Babilon keil umai amu lin me-Sudah keil. Avuli kat keil ka alah vasi keil uva en kantri one ten out Babilon.^b

⁴En avong enek, Iahova mai selus minau vit,

⁵“Seremaea, mulamu en avong koa namumonuk en vangen mama onom, nakileak tuai.

Anatin, mulamu en avong avasuk, nalei kanuk tuai.

Nalei kanuk kovamai kovahi **provet** onak kovaha ven meatin keil ten kantri sav keil.”

⁶Ka navit kesi mini navit, “!O Iahova ten Keihoen! Inau narkilea revitei sakien keil ten selusien veni navi meatin hau enges.”

⁷Ka Iahova viteni minau vit, “Konaselustei konahit keik kovi meatin hau enges. Kiha ven meatin vasi koa nasilik kovaha ven keil, ka kiha kisan selusien vasi keil koa nameng katuk keke kovahiteni.

⁸Konametauntei keil veni, Inau, naro venuk ka niting koek. Inau, Iahova, nasan selusien vasi keilek.”

⁹Evis, Iahova mutelan hen ka rokol ongok ka viteni vit,

“Kosa naling selusien keil onak mul en ongom.

¹⁰?Kolonge? Kosa nalei kanuk kovakur keihoen

^a 1:2 2Ki 21:1-23:4 ^b 1:3 2Kron 36:14-23

keke kovahit mesein asa koa hekistal min meatin keil ka en kantri
keil emun.

Munak kihiteni minau makulat asuv houlu tai ten kantri tai ka mou
lin meatin keil onen,
inau numoni.

Munak kihiteni minau mou rasilin out tai ka maling meatin sav keil
avalosil kati,
inau numoni.

Ka munak kihiteni mahati lat kantri tai ka maluh ris ah keil teni,
kei mun, numoni.

17¹⁷“!Seremaea, mea, kisak meseinuk ka kiha! Kiha kilomal ka
kihithehiton tounah vasi koa nameng katuk kovahiteni. Kosa,
konametautei kovaselus en meten meatin keil. Veni munak kil kimetau,
asa koa inau numoni heha katuk hesakinuk kimetau hemarite mok en
mete. **18-19** Seremaea, kitaengon revi enau. Meatin vasi keil ten kantri
koanek ivae heha katuk: asuv houlu keil ten out Sudah, hetetamen
keil one, pris keil one, ka me-Sudah vasi keil emun. Ka keil isakras
avahitan enuk veni inau niting koek. Kosa nasan keihoen minuk kovamai
kovasoval vies takeih tai koa karahit koe taon tai. Anatin, keik kimai
kisuval pos tai ten usi eim koa keih koa amumoni en aean, veni inau,
Iahova, naro vesesal venuk ka namese moutut moulien onom.”

6 ¹³“Meatin vasi keil, koakeil avi hetetamen umai arokol koakeil avi
havipi, keil vasi avi metenan ka akur mani en sise koa romaltei.
Avaseini keil avi pris vuo provet keil, keil amules aluvos meatin keil keke
avalah mani one. ¹⁴Kosa, tounah keil houlu amul apurun meatin keil
onak, ka avat keil amum heisav enges. Hetetamen keil enek amul aviteni
min meatin keil avit, ‘Tomat onen Ahi hel ven kami.’ Ka kosa, tomat
tovuol varei.”^c

17 ⁵Koanek selusien onen Iahova koa ka en provet Seremaea vit,
“Mahien hel en koakeil envatien one romulteri enau ka koakeil
aviles ranau.

Keil aling desien one en keihoen onen meatin enges.

⁶ Keil asuval holeai keil koa amoul en out volvol,
keil asakras avales tahosien en moulien one.

Moulien one hehi heite hon hesuval out tames,
ka hesuval out koa sol purun atan teni keke tounah tovuol vamoul
ien.

⁷“Ka koakeil aling desien one mul enau,

^c **6:14** Esek 13:10

inau nitokol kat keil.

⁸ Keil isuval vatiai keil koa aluhi mul en vali oaisal,^d
koalite keil amoul arokol oai.

Avaseini mahien keil umai hesuval meteiai ritin keih,
keil asakras avametau veni iles tahosien hesuval vatiai koa oute
keil memeasen lises.

Avaseini ous romustei,
keil amules arekao.

⁹ “Tin meatin keil vilehilu, lises mul liluvos.

Meatin tovuol vailea vasi en tisaen keil koa mul suai eni.

¹⁰ Ka inau, Iahova, nalei kilea en rendemien onen meatin keil,^e
ka nalei revi tounah koa mul en tine.

Sakini, nisa kesi min keil housil sakien keil koa amumoni,
ka nisan heite ten umen one min keil.

20 ⁵“En avong keil koa amul umai, vativieh keil onami imai ivae
heha kat taon onami ten out Serusalem. Ka keil ilah mani ka
tounah vasi onami koa tahos imok koa amumoni en gol, silva ka more
ahat keil hehi one. Anatin, keil ilah tounah sav vasi koa tetahos emun
koa asuv houlu keil ten out Sudah aling ruaini mul, ka ilahi heha ris en
kantri one ten out **Babilon.**”

Seremaea selus kutut usil umen koa Ahi sani mini

Seremaea 20:7-13

⁷Evus, provet Seremaea vis Ahi vit,

“O Iahova, keik koluvos inau
ka inau nakur anatin eni.

Ral min keihoen onom, kokeih kat nau,
ka komulinau.

!Ven selusien koa kosani minau, meatin vasi keil amul akarenau!
!Lises amul aviteai enau!

⁸ Ka navong vasi namang vas ongok maselus,
keik kosakinav naviso va kat meatin keil ka namakul kat keil navit,
‘Vaeen keil imai ka u lin tounah vasi onami!’

O Iahova, meatin keil amunge katnau ka avit usil nau
veni namul navitehit selusien onom.

⁹ Ka munak naviteni en rendemien onak navit,
‘Nirselustei usil Ahi ka nirvit meseintei mun selusien onen en
Isen,’

^d 17:8 Sam 1:3 ^e 17:10 Sam 62:12; Rev 2:23

- selusien onom mai suval ahang
 koa mukan purun tinok.
Nasak visi mahuli kat selusien onom,
 ka nasakras varei.
- ¹⁰ Nalong meatin keil aselus lelau va kat nau avit,
‘Meatin ekek vi uti metauen varei.
 !Rovaha rovahit lat kei min avat orer keil!’
More tuak vasi keil e vat nau mamot en selusien onak
 ka arosinau keke avasak luvos nau.
Keil amul avit, ‘Munak rokilea rovasak luvosi,
 ir rehut kati ka rehouasi vasa kes mahien koa selusien onen
 mumoni vakat ir.’
- ¹¹ Ka keik, Iahova, komul koring koe nau suval meatin tavaeen tai koa
aven keih.
 Sakini, koakeil asak visi avapurunau, keil imot.
 Keil isak visi mok ihit avouas nau, ka keil isakras.
Keil imemou vareis
 veni keil asakras avoumon etai tounah vaha kat inau.
Memouen one, meatin sav keil asakras e vavobongeni en avong etai.
- ¹² O Iahova, asuv houlu ten out nesa, keik kolei revi usite onen koakeil
amal en metom,
 ka kokilea asa koa mul en tine ka rendemien one.
Sakini, ek vati malesuk kovasa kes mahien min vativieh keil onak,
 veni naling usite onak mul en hem.
- ¹³ “!Sakini, mihesau min Iahova!
 !Anatin, mihehati lat Isen!
Veni kei mul mutut koakeil meatin sav keil amul apurun keil,
 ka mul lah lat keil ran hen koakeil atisa.”

Iahova vat kati keke heling ris meatin keil onen ito en atan kati one
Seremaea 23:1-6; 29:1,10-12; 31:3,31-34

23 ¹Iahova selus min meatin keil ka en provet Seremaea vit,
“!Hetisa mok min avat keil onen me-Isrel keil koa amul asak
purun meatin keil onak! Keil asuval meatin tisa keil koa arlosil kat revitei
sipsip keil ose ka amaen keil aretasil.”

²Ven sakien one, koanek vi selusien onen Iahova, Ahi onen me-Isrel
keil, va min avat keil koa ling keil avalosil kat revi meatin keil onen.
Kei mul viteni vit, “!Kami mirlosil kat revitei meatin keil onak! Milikat
rasilin keil avaha. Sakini, nisan mahien min kami ven tounah tisa keil
ko a mimumoni. ³Hevus, inau nilah ruain vangi meatin keil onak imai
ris ran kantri sava sav keil koa namaen keil aratasil uva aro ien. Anatin,

nilah ris keil imai ito en atan kati one ka ikur titiali keil imai ihi houlu eris. ⁴En avong enek, inau nilei kan avat keil koa imai ilosil kat revi keil. Keil isuval meatin keil koa alosil kat revi sipsip ose keil ka umon keil irmetautei mun ka irmundemkotei. Tovuol en keil hevuol.”

⁵Iahova selus eris vit, “Avong tai mul mai keke nihat lat asuv houlu tai koa sakien onen mal revi ran vatiamal onen **Deved**. Kei helosil kat meatin keil hetahos ka helei revi usite one housil meteisauen onen. Min koakeil amum tisa, kei hesan mahien min keil, ka min koakeil amum tahos, hesan tahosien min keil. ⁶Navong kei vi asuv houlu, me-Sudah keil ito en tahosien, ka me-Israel keil ito en tomat. Keil ihise en ‘Iahovasidkenu’ koa aneite teni vi ‘Iahova vi maluen orer.’ ”

29 ¹Koanek selusien koa **provet** Seremaea, koa mul en out **Serusalem**, mutisi ka sani min elda keil, pris keil, provet keil, ka me-Israel vasi keil emun koa asuv houlu Nebukanesa lah lat keil ran out Serusalem keke aval en hen en out **Babilon**.^f

¹⁰Provet Seremaea mutisi vit, “Koanek selusien onen Iahova koa vit, ‘Kami miheto en hen me-Babilon keil hetokol sua hanumau etel ka halualim emun (70). Hevus, niha ris niles kami ka num housil hatkatien koa namumoni ral min kami keke malah ris kami mivamai en atan ekek. ¹¹Anatin eli, inau, Iahova, namundem kati keih asa koa naling kati keke vakistal en kami. Naling kati keke kami miheles tahosien ka hervitei mahien. Anatin, tounah keil tetahos koa naling kati hemai hekistal en moulien onami, mihendem usili hetal min sien veni mikilea hemai hehi anatin. ¹²En avong enek, navong kami mihehise nau ka mihehis minau, inau nilong hisien onami. ¹³Anatin, navong mihelekat nau hetal min tinomi vasi, mihehotinai. ¹⁴Anatin, nimaen kami mihehotinai, ka inau, Iahova, nisan ris asa koa vuol ran kami. Nikur ris kami mihemai ran kantri keil ka out vasi koa nalikat kami miva miro ien. Hevus, nikur ris kami miheha miheto en atan koa nasila lat kami rani. Inau, Iahova, nasan selusien vasi keilek.’ ”

31 ³Mulamu, Iahova kistal min ir ka viteni vit,
“Inau, ek vat kami ral envatieng koa keite teni tovuol.
Ral min tahosien koa narie lati min kami, naleh kami mimai vesesal venau.

³¹“Sakini, inau, Iahova, naviteni keke avong tai mul mai
keke numon hatkatien hau takeih hetal min me-Israel keil ka hetal
min me-Sudah keil emun.^g

³²Hatkatieng hau koanek hersuvaltei hatkatien matu

^f 29:1 2Kron 36:14-21 ^g 31:31 Hib 8:8-12

koa namumoni ral min avu one keil telamu
 en avong koa navuli kat he
 ka namulamun keil alokovein kantri ten out **Isip.**
 Inau nalei kat revi keil suval meatin tai mul lei kat revi ahin onen.
 Ka avaseini, keil arali koteh **hatkatien takeih** koa amumoni ral
 minau.

³³ Hatkatien hau koa numoni hetal min me-Isrel keil en avong enek
 hemukok:
 Inau, Iahova, niling mengkatien onak keil il en rendemien one,
 ka nitis kati hel en tine.^h
 Inau nihi Ahi one,
 ka keil ihi meatin keil onak.

³⁴ Hesakini, keil irviseintei mun tue keil availea en Iahova
 veni keil vasi ilea enau,ⁱ
 koakeil avi havipi heha hetokol koakeil amarite.
 Anatin, keil ilea enau veni nirleletei mun hetisa en keil
 ven tounah keil one koa romaltei amumoni.
 Anatin, nirmundem usiltei mun tisaen keil one
 koa va kat keil.
 Inau, Iahova, nasan selusien vasi keilek.”

^h 31:33 Hib 10:16 ⁱ 31:34 Hib 10:17